

其人卽餒

寸口脈浮大病全在表醫反下之則在表之陽邪下陷而胃中之眞陽不治遂成結胸等證故爲大逆浮主氣故曰無血卽浮爲在表未入於陰之互辭大卽爲寒見外感之邪全未外解也中有一證下陷之邪與藏氣相搏而爲腸鳴者此必未嘗痞結至極蓋痞結卽不復轉氣也醫不知其人邪已內陷當將差就錯內和其氣反飲水令大汗出是下之一損其胃中之陽飲水再損其胃中之陽腹中之邪隨汗出還返於胃與水氣相搏且夾帶濁氣上干清氣其人卽餒餒者胃氣垂絕之象傷寒之危候也然其死與不死尙未可定蓋脈之浮大本非微弱之比而邪之內陷當大逆者止成腸鳴小逆

醫門法卷之一
倘發飭已後陽氣漸回水寒漸散仍可得生觀後條仲景謂
寒聚心下當奈何也此則聚而不散無可奈何仁人之望絕
矣

○一申治傷寒病致人胃寒之律

寸口脈濡而弱濡卽惡寒弱卽發熱濡弱相搏藏氣衰微胸中
苦煩此非結熱而反薄居水漬布冷銚貼之陽氣遂微諸府無
所依陰脈凝聚結在心下而不肯移胃中虛冷水穀不化小便
縱通復不能多微則可救聚寒不散當奈何也

此見寸口陽脈濡陰脈弱乃藏氣素衰之徵陽濡則惡寒陰
弱則發熱其人胸中苦煩卽爲虛煩不當認爲結熱而以水
漬布冷貼重傷其胸中之陽也蓋胸中之陽爲諸府之所依

藉陽氣一微陰氣卽凝結心下如重陰蔽曉胃中水穀無陽以化而水寒下流小便縱通然陽不化氣復不能多履霜堅冰可奈何耶亦因平素脈之濡弱知其胸中之陽不能復辟耳

○一申治傷寒病過壯盛人發汗過輕之律

寸口脈洪而大數而滑洪大則營氣長滑數則衛氣實營長則陽盛拂鬱不得出身衛實則堅難大便則乾燥三焦閉塞津液不通醫發其汗陽氣不遇重復下之胃燥乾畜大便遂損小便不利營衛相搏心煩發熱兩眼如火鼻乾面赤舌燥齒黃焦故大渴過經成壞病鍼藥所不能制與水灌枯槁陽氣微衰身寒溫衣覆汗出表裏通然其病卽除形脈多不同此愈非法治但

醫所當慎妄犯傷營衛

此見營衛強盛三焦堅實之人雖發其汗未必周到必須更汗通其拂鬱若誤下之則熱證百出遂致過經而成壞證鍼藥所不能制勢亦危矣與水灌令陽散汗出因而病愈以其人營衛素盛故幸全耳然人之形體多有不同設營衛素弱將奈之何故叮嚀云此愈非法治醫當謹持於汗下之先勿使太過不及乃爲盡善若不辨形脈之強弱而憑臆汗下必犯太過不及之戒而傷人之營衛矣

○一申治傷寒病不審營衛素虛之律

脈濡而緊濡則陽氣微緊則營中寒陽微衛中風發熱而惡寒營緊胃氣冷微嘔心內煩醫以爲大熱解肌而發汗亡陽虛煩

躁心下苦痞堅表裏俱虛竭卒起而頭眩客熱在皮膚悵悵不得眠不知胃氣冷緊寒在關元技巧無所施汲水灌其身客熱應時罷慄慄而振寒重被而覆之汗出而冒顛體惕而又振小便爲微難寒氣因水發清穀不容閒嘔變反腸出顛倒不得安手足爲微逆身冷而內煩遲欲從後救安可復追還

此見脈之濡而緊者爲陽氣微營中寒陽微衛中風外則發熱惡寒營緊胃中冷內則微嘔心煩醫不知其外熱內冷以爲大熱而從汗解之則表裏俱虛客熱淺在皮膚緊寒深在關元猶汲水灌其客熱致寒證四出不可復救也

前壞證汗下兩誤鍼藥莫制與之以水而倖痊以其營衛素盛也此一證營衛素虧雖不經下但只誤汗誤與之水卽屬

不救然則證同脈異不察其脈但驗其證徒法不能行矣過
愆其可免乎

○一申治傷寒病不審陽盛陰虛之律

脈浮而大浮爲氣實大爲血虛血虛爲無陰孤陽獨下陰部小
便難胸中虛今反小便利而大汗出法當衛家微今反更實津
液四射營竭血盡乾煩不眠血薄肉消而成暴液醫復以毒藥
攻其胃此爲重虛客陽去有期必下污泥而死

脈浮而大氣實血虛雖偏之爲害亦人所常有也若此者陰
部當見不足今反小便利大汗出外示有餘殊非細故矣設
衛氣之實者因得汗利而脈轉微弱藉是與營無忤庶可免
危若衛分之脈較前加堅實則陽強於外陰必消亡於內所

爲小便利大汗出者乃津液四射之徵勢必營竭血盡乾煩不眠血薄肉消而成暴液下注之證此際安其胃固其液調和強陽收拾殘陰岌岌不及況復以毒藥攻其胃增奔迫之勢而蹈重虛之戒令客陽亦去嘔血如泥而死哉傷寒病陽強於外陰亡於內之證最多醫不知脈其操刀可勝數耶

○一申治傷寒病不診足脈強汗動其經血之律

跌陽脈浮浮則爲虛浮虛相搏故令氣餒言胃氣虛竭也脈滑則爲臧此爲醫咎責虛取實守空迫血脈浮鼻中燥者必衄也寸口脈浮宜發其汗謂邪在太陽營衛間未深入也若至陽明卽在經之邪以汗爲大禁矣設其人胃氣充實亦何必禁之故邪入陽明必經跌陽足脈跌陽脈浮卽是胃氣虛餒不

可發汗所以有建中之法建立中氣然後汗之以汗卽胃中之津液也津液不充強發其汗則邪與虛搏其人必餽若脈見浮而且滑則其搏虛者且轉爲噦深於餽矣此皆醫者不察足脈之咎強責胃氣之虛劫汗以取其實邪致令胃中之守空而逼其血外出蓋陰在內爲陽之守胃中津液爲陽其不外泄者賴陰血以守之故強逼其津液爲汗斯動其所守之血矣其外邪勝而鼻中燥者必衄其不衄者亦瘀畜胃中而生他患也此與誤發少陰汗者同科而減等少陰少血動其血則下厥上竭而難治陽明多血但釀患未已耳

○一申治傷寒病不診足脈誤下傷其脾胃之律

趺陽脈遲而緩胃氣如經也趺陽脈浮而數浮則傷胃數則動

脾此非本病特醫下之所爲也營衛內陷其數先微脉反大浮
其人大便鞭氣噫而除何以知之本以數脉動脾其數先微故
知脾氣不治大便鞭氣噫而除今脉反浮其數改微邪氣獨留
心中則飢邪熱不殺穀潮熱發渴數脉當遲緩脉因前後度數
如法病者則飢數脉不時則生惡瘡也

跌陽足脉以遲緩爲經常不當浮數若見浮數知醫誤下而
傷胃動脾也營衛環轉之氣以誤下而內陷其數脉必先改
爲微而脾氣不治大便鞭氣噫而除此皆邪客於脾所致卽
鍼經脾病者善噫得後出餘氣則快然如衰之謂也邪熱獨
留心下雖飢復不殺穀抑且潮熱發渴未有愈期必數脉之
先微者仍遲緩如其經常始飢而消穀也若數脉從前不改

爲微則邪熱未陷於脾但鬱於營衛主生惡瘡而已

○附申治傷寒不可犯六經之禁

足太陽膀胱經禁下若下之太早必變證百出足陽明胃經禁發汗禁利小便犯之則重損津液脈必代結足少陽膽經禁汗禁下禁利小便汗則犯陽明下則犯太陽利小便則使生發之氣陷入陰中太陽經一禁陽明經二禁少陽經三禁此定禁也至三陰經則無定禁但非胃實仍禁下耳

○附申治雜證不可犯時禁病禁藥禁

時禁者春夏禁下秋冬禁汗春夏而下秋冬而汗是失天信伐天和也然病有不得已而從權汗下者病去遂改若續用之是故意違天而自取不祥也

病禁者病人陽氣不足陰氣有餘則禁助陰瀉陽病人陰氣不足陽氣有餘則禁助陽瀉陰以及老少不同新久異治之類藥禁者津液內亡作渴禁用淡滲五苓汗多禁利小便小便多禁發汗咽痛禁發汗利小便大便快利禁服梔子大便秘澇禁用燥藥吐多不得復吐吐而上氣壅滯大便不通止可宣散上氣禁利大便脈弦禁服平胃而虛虛脈緩禁服建中而實實

治天下有帝王之律治仙神有上天之律至於釋門其律尤嚴三藏教典儀律居三之一由五戒而五百戒由五百戒直造自性清淨無戒可言而道成矣醫爲人之司命先奉大戒爲入門後乃盡破微細諸惑始具活人手眼而成其爲大醫

何可妄作聰明草菅人命哉嘗羨釋門犯戒之僧卽不得與
眾僧共住其不退心者自執糞穢雜役三年乃懇律僧二十
眾佛前保舉始得復爲佛子當今世而有自訟之醫乎昌望
之以勝醫任矣

○先哲格言

大凡物理有常有變運氣所主者常也異於所主者皆變也常
則如本氣變則無所不至而各有所占故其候有從逆淫鬱
勝復太過不及之變其法皆不同若厥陰用事多風而草榮
茂此之謂從天氣明潔燥而無風此之謂逆太虛埃昏池水
不冰此之謂淫大風折木雲物混擾此之謂鬱山澤焦枯草
木凋落此之謂勝大暑燔燎螟蝗爲災此之謂復山崩地震

埃昏時作此之謂太過陰森無時重雲晝昏此之謂不及隨其所變疾癘應之皆視當時當處之候雖數里之閒但氣候不同而所應全異豈可膠於一定

歲運有主氣有客氣常者爲主外至者爲客初之氣厥陰以至終之氣太陽者四時之常序也故爲之主氣惟客氣本書不載其目故說者多端或以甲子之歲天數始於水下一刻乙丑之歲始於二十六刻丙寅歲始於五十一刻丁卯歲始於七十六刻者謂之客氣此乃四分曆法求大寒之氣何與歲運又有相火之下水氣乘之土位之下風氣乘之謂之客氣此亦主氣也與六節相須不得爲客凡所謂客者歲半以前天政主之歲半以後地政主之四時常氣爲之主天地之政

爲之客逆主之氣爲害暴逆客之氣爲害徐調其主客無使傷疹此治氣之法也

沈存申

少角之運歲木不及侮而乘之者金也金不務德故以燥勝風時則有白露早降收氣率行其變爲肅殺其災爲蒼隕名爲少角而實與大商之歲同少徵之運歲火不及侮而乘之者水也水不務德故以寒勝熱時則有寒霧凝慘地積堅冰其變爲凜冽其災爲霜雹名爲少徵而實與大羽之歲同少宮之運歲土不及侮而乘之者木也木不務德故以風勝濕時則有大風飄暴草偃沙飛其變爲張發其災爲散落名爲少宮而實與大角之歲同少商之運歲金不及侮而乘之者火也火不務德故以熱勝燥時則有火延焦槁炎赫沸騰其變

爲銷鑠其災爲燔炳名爲少商而實與大徵之歲同少羽之
運歲水不及侮而乘之者土也土不務德故以濕勝寒時則
有泉涌河衍涸澤生魚其變爲驟注其災爲霖潰名爲少羽
而實與大宮之歲同通乎此則歲在涸流之紀而河決大水
固可以類而推之也

劉溫舒

天地之間氣有偏勝而無以救之則萬物之所存者幾希矣是
故風熱燥寒濕五者各司一氣生長化收藏五者各司一時
以順相乘然後能循環以相生以逆相勝然後能循環以相
救故曰五氣之運猶權衡也故高者抑之下者視之化者應
之勝者復之化者應之氣之平也五氣之相得也勝者復之
氣之不平也五氣之相賊也氣平而相得者所以通其常氣

不平而相賊者所以觀其變古之明乎此而善攝生者何常

不消息盈虛以道御神耶

劉溫舒

太陽司天之政歲宜以苦燥之溫之陽明司天之政歲宜以苦
辛汗之清之散之又宜以鹹少陽司天之政歲宜以鹹宜辛
宜酸滲之泄之漬之發之觀氣寒溫以調其氣太陰司天之
政歲宜以苦燥之溫之甚者發之泄之不發不泄則濕氣外
溢肉潰皮坼而水血交流少陰司天之政歲宜鹹以栗之而
調其上甚則以苦發之以酸收之而安其下甚則以苦泄之
厥陰司天之政歲宜以辛調之以酸潤之

纂經旨

歲以陽爲首正正也寅引也少陽之氣始於泉下引陽升而在
天地人之上即天之分五穀草木皆甲坼於此時也至立夏

少陰之火熾於太虛則草木盛茂垂枝布葉乃陽之用陰之體此所謂天以陽生陰長經言歲半以前天氣主之在乎升浮也至秋而太陰之運初自天而下逐陰降而徹地則金振燥令風厲霜飛品物咸殞其枝獨在若乎毫毛至冬則少陰之氣復伏於泉下水冰地坼萬物周密陰之用陽之體也此所謂地以陽殺陰藏經言歲半以後地氣主之存乎降沉也飲食入胃而精氣先輸脾歸肺上行春夏之令以滋養周身乃清氣爲天者也升已而輸膀胱行秋冬之令爲傳化糟粕轉味而出乃濁陰爲地者也若夫順四時之氣起居有時以避寒暑飲食有節及不暴喜怒以順神志常欲四時均平而無偏勝則安不然損傷脾胃真氣下溜或下泄而久不能升